

**Unsa man
ang Tawo?**



Unsa man ang iyang tawhanong kinaiya ug pisikal nga komposisyon? May kalag ba siya nga mobulag sa iyang patayng lawas ug mosaka ngadto sa langit o di ba kaha mokanaog sa impyerno human siya mamatay? O aduna ba siya'y tiunay nga kinabuhing-dayon sukad pa sa sinugdan sa iyang pagkahimugso'? Unsa man ang kinatumyan sa iyang kinabuhi?

Ang mga pangutana

Aduna ba'y hinungdan ang atong paglawig niining kalibotana? Ania lang ba kita karon ug mahanaw na lamang pagkaugma? Unsa man ang atong komposisyon, ang tinubdan sa atong kinabuhi? Asa man kita paingon inigkahuman niining atong paglawig dinhi sa kalibotan?

Aduna ba kita'y kalag nga mobulag sa atong patayng lawas nga maoy mosaka sa langit o di ba kaha ibanlod sa impyerno gumikan sa atong mga binuhatan samtang buhi pa kita? Kining maong mga pangutana dili kinahanglan ipadaplin ug isalikway ug di ba kaha ikonsidera na lang nga misteryo. Mahinungdanong atubangon nato' kini, hataga'g dakong importansya, ug tubagon sa paagi'ng tin-aw ug hayag sa panghunahuna

aron masuta' ang kamatuoran sa tawhanong kinaiya.

Pagkakaran, dili nato' ikalimod ang pagkaylap sa kaalam ug edukasyon niining ika-21 nga kagatusan. Ang kinaadman, teknolohiya ug syensya nagtambayayong aron makahatag ug dakong kausaban sa atong mga kalihokan. Bisan tuod wala kini makapaharuhay sa kinatibuk-ang lumolopyo sa kalibotan, dili nato' ikalimod nga daghang nabulahan ug nakatagamtam sa mga gidulot niini sa atong inadlawng kalihokan. Konbenyente, gaan, sayon ug dali himoon ang mga buluhaton nga kanhi makuti ug may kalisdanan. Usa niini ang kumikasyon diin sayon na kaayong makigtabi' ug magpadala ug mahinungdanong balita sa mga kaigsoonan ug mga kabanay nga atua sa lagyong lugar.

Apan bisan pa niining tanan, aduna'y dakong mga pangutana nga hangtud karon dili pa sayon tubagon bisan sa mga tag-as ug kinaadman, sa mga banggaitang personalidad, ug bisan pa ngani sa mga nagkupot ug katungdanan sa simbahan nga unta sila man ang gilaoman nga adunay hipno nga nasayran kon unsa man gayod ang tawo. Busa, unsa man gyod ang tawo, ang iyang kinatibuk-ang komposisyon, ang iyang kinaiya ug ang iyang pagkatawhanon? Laktod nga pagkasulti, unsa man ikaw ug ako?

Sukad sa pagkaylap sa “Teoriya sa Ebolusyon” nga gipasiugda ug giduso' ni

Charles Darwin, daghang mingtuo nga ang tawo ningtumaw lamang pinaagi sa ebolusyon nga nahitabo sa miaging pipila ka bilyon nga mga katuigan. Mapamatud-an ba nato' kini nga hangtud karon nagsige pa man ug pangampanya ang mga nagduso sa maong teoriya sa nataran sa edukasyon ug siyensya? Angay natong masaayran nga ang “teoriya” dili mahimong tinuod hangtod nga kini mapamatud-an sa dili ikalalis ug walay duda nga mga pruweba.

Busa ngari ta sa Biblia. Kong atong pakli-paklion ang mga panid niini sa panlantaw nga dili mapihigon, gamitan ug dyotayng lohika ug diwa nga makatarunganon, ang mga pahayag niini mahitungod sa tawo mas dali' natong masabtan. Niining libroha hayag ug tin-aw ang mga giasoy mahitungod sa mga pangutanang una natong gidalit. Mas dali sabton ang mga pulong sa Dios mahitungod sa mga binuhat apil na ang tawo. Sa usa ka inspiradong sulat ni Apostol Pablo ngadto sa mga kristianos sa Roma, dili ikalimod ang simpleng pahayag nga ang pagtumaw sa mga binuhat wala magagikan sa ebolusyon, kondili sa usa ka Dios nga nagbuhat sa tanan.

Paminaw: Ang masayran sa tawo bahin sa Dios gipadayag Niya kanila sa klaro gayod. Ang Dios gayod maoy nagpatin-aw niini kanila. Sukad buhata sa Dios ang kalibotan, and Iyang dili makita nga kinaiya, ang Iyang gahom nga walay kataposan ug ang Iyang

pagka-Dios, nakita nga klaro kaayo diha sa mga butang nga gibuhat sa Dios. Busa wala na sila'y (ang mga ebolusyonista) ikabalibad (Roma 1:19-20).

Mahibaloan nato ang Dios pinaagi sa Iyang mga binuhat, ug dili pinaagi sa mga butang nga wala hunahunaa, sa mga ningtumaw nga wala damha, ug sa mga panghitabo nga dili tinuyo. Ang pinakmalig-on nga pruwera nga magpamatuod nga adunay Dios nga nagbuhat sa tanan mao ang imo ug ang akong pagka-ania karon! Ang balaod sa kinaiya o 'biogenesis' nagpamatuod nga ang kinabuhi nagagikan lamang sa kinabuhi; busa ang tanang may kinabuhi nagagikan lamang sa makahatag ug kinabuhi. Ang Biblia nagaingon nga si Cristo ang tinubdan sa kinabuhi (Buhat 3:15).

Ang Tawhanong Kinaiya

Atong hisgotan ang 'komposisyon' sa tawo; ang iyang lawasnong kinaiya, ang iyang kinatibuk-ang hiyas sumala sa gipahayag sa Balaang Kasulatan. Atong sukut-sukiton ug unsa ba gayod ang kinatibuk-ang komposisyon ug mga sambog sa tawo.

Unsa ba gayod ang tawhanong kinaiya? Unsa man ang mga materyales nga gigamit aron mahimo siyang tawhanon? Unsa ang iyang kinaiya, ug labaw sa tanan, unsa ba gayod ang iyang destinasyon?

Mao kana ang mga pangutanang nahimong tanghaga nga wala mahatagi'g tin-awng pahayag sa mga makinaadmanon, mga syentipiko, mga relihiyoso ug ang bisan pa niadtong mga inila ug mga banggaitang mga utokan. Apan ang Biblia nagahatag ug tin-awng pahayag sa maong mga pangutana.

Ang Tawo

Kung yano ug dili matukibon ang pang-usisa, ang kinaiya sa tawo daw sama sa usa ka misteryo. Apan ang Dios nagpahayag sa dili masaypang pagpasabut kon unsa ang tawo, ug kon nganong gitratar Niya kining usa ka primera klaseng “ubra maestra”.

Tungod kay ang Dios man maoy nagbuhat sa tawo, angayan lang natong masayran gikan Kaniya kong unsay mga kasangkapan ug unsay hinungdan ngano nga gibuhat man kita Niya. Kon atong basahon sa sinugdan sa dihang gibuhat sa Dios ang kalibotan, dinhi atong makita kon unsa ang mga butang nga Iyang giandam usa` Niya buhata ang tawo. Giandaman Niya kini'g mga kabtangan aron ang mga tawhanong pangihananglan masustineran—tubig, yuta, mga halaman, isda sa kadagatan, mga hayop sa kabalilihan, ilang mga puloy-anan, langgam sa kalangitan sumala sa tagsa-tagsa nila ka matang. Lima (5) ka adlaw ang gigahin sa Dios pagmugna sa mga gikinahanglan sa tawo usa` Niya buhata ang tawo sa ikaunom (6) nga adlaw.

Gihimo niya ang kalibotan alang sa sa katawhan. Matud sa Esias 45:18, “Kay kini mao ang giingon ni Jehova nga nagbuhat sa mga langit, ang Dios nga nag-umol sa yuta ug naghimo niini, nga nagtukod niini ug nagbuhat niini nga walay nakawang, nga nag-umol niini aron pagapuy-an: Ako mao si Jehova; ug wala nay lain.” Busa, ang kalibotan wala buhata sa Dios nga walay pulos.

Ang tanang gibuhatsa sa Dios, ang pag-umol sa kalibotan, ang pagpatubo sa mga halaman, ang paghimog mga mananap ug mga isda sa kadagatan gihimo lamang alang sa tawo. Lakip na niini ang tanang adunay ginhawa gihimo Niya sumala sa ilang tagsa-tagsa ka matang.

Genesis 1:11-28

Ug miingon ang Dios: Magpaturuk ang yuta ug balili, talamnon nga magahatag ug binhi; ug himunga nga mga kahoy nga magahatag ug bunga ingon sa ilang matang diin anaa kaniya ang iyang binhi sa ibabaw sa yuta: ug nahimo kini.

Ug ang yuta nagpaturuk ug balili, talamnon nga nagahatag ug binhi, ingon sa ilang matang; ug mga kahoy nga nagahatag ug bunga, nga maoy binhi niini, ingon sa ilang matang, ug nakita sa Dios nga kini maayo.

Ug dihay kahaponon ug dihay kabuntagon, adlaw nga ikatolo.

Ug miingon ang Dios: Mahimo ang mga kahayag sa hawan sa langit aron sa pagbulag sa adlaw gikan sa gabii; ug himoa sila nga alang sa mga ilhanan, ug alang sa mga panahon, ug alang sa mga adlaw ug sa mga katuigan;

Ug himoa sila nga mga kahayag sa hawan sa langit aron sa paghatag ug kahayag sa ibabaw sa yuta: ug nahimo kini.

Ug gibuhat sa Dios ang duruha ka dagkung mga kahayag: ang labing dakung kahayag sa paghari sa adlaw ug ang labing diyutay nga kahayag sa paghari sa gabii; gibuhat usab niya ang mga bitoon.

Ug gibutang sila sa Dios sa hawan sa langit, aron magaiwag sa ibabaw sa yuta,

Ug aron sa paghari sa adlaw ug sa gabii, ug aron sa pagbulag sa kahayag gikan sa kangitngit: ug nakita sa Dios nga kini maayo.

Ug dihay kahaponon ug dihay kabuntagon, adlaw nga ikaupat.

Ug miingon ang Dios: Dumagsang sa mga tubig ang duot sa mga binuhat nga buhi, ug manglupad ang mga langgam sa ibabaw sa yuta diha sa hawan sa langit.

Ug gibuhat sa Dios ang dagkung mga mananap, ug ang tanang mga binuhat nga buhi nga nagalihok nga mitungha sa mga tubig, ingon sa ilang matang ug ang tagsatagsa ka langgam nga pak-an, ingon sa iyang matang: ug nakita sa Dios nga kini maayo.

Ug gipanalanginan sila sa Dios, nga

nagaingon: Sumanay ug dumaghan kamo, ug punon ninyo ang mga tubig sa mga dagat, ug padaghanon ang mga langgam sa yuta.

Ug dihay kahaponon ug dihay kabuntagon, adlaw nga ikalima.

Ug miingon ang Dios: Magpatubo ang yuta ug mga binuhat nga buhi ingon sa ilang matang, mga kahayopan, ug mga butang nga nakagamang sa yuta, ug mga mananap sa yuta ingon sa ilang matang: ug nahimo kini.

Ug gibuhat sa Dios ang mga mananap sa yuta ingon sa ilang matang, ug ang kahayopan ingon sa ilang matang, ug ngatanan nga mananap nga nagakamang sa ibabaw sa yuta ingon sa ilang matang: ug nakita sa Dios nga kini maayo.

Ug miingon ang Dios: Buhaton nato ang tawo sumala sa atong dagway, ingon sa kasama nato; ug magabuot sila sa mga isda sa dagat, ug sa mga langgam sa kalangitan, ug sa mga kahayopan, ug sa tibook nga yuta, ug sa tanan nga nagakamang sa ibabaw sa yuta.

Ug gibuhat sa Dios ang tawo sa iyang kaugalingong dagway, sa dagway sa Dios gibuhat niya sila, lalake ug babaye iyang gibuhat sila.

Ug gipanalanginan sila sa Dios, ug miingon ang Dios kanila: Sumanay ug dumaghan kamo, ug pun-on ninyo ang yuta, ug magagahum kamo niini, ug magbaton kamo sa pagbulotan sa ibabaw sa mga isda sa dagat, ug

sa mga langgam sa kalangitan, ug ibabaw sa tanan nga binuhat nga buhi nga nagalihok sa ibabaw sa yuta.

Busa unsa man ang tawo? Makapakugang ug dili basta-basta katoohan ang kamatuoran! Apan, motuo ka'g dili, ang tawo gibuhat sumala sa panagway sa Dios—sumala sa matang sa Dios o “God kind”. Kadaghanan seguro makaingon nga usa kini ka panamastamas nga panultihon. Apan ang pulong sa Dios tin-awng nagbutyag nga ikaw ug ako gibuhat sa matang sa Dios—God kind. Mao kana ang kamatuoran nga nahisulat sa mga panid sa imong Biblia. Ingon niana ka bililhon ang pagtagad sa Dios sa katawhan—gihimo ka nga sama sa panagway sa Dios! Karon, kon gibuhat ka sa Diosnong matang, nganong ulipon pa man kita sa kamatayon? Dili ba ang Dios adunay kinabuhing-dayon? Kon namatay man si Cristo aron maluwas kita sa atong mga sala, dili ba nabanhaw man usab Siya sa usa ka kinabuhing wala'y kamatayon ug atua karon naglingkod sa tuohan sa Dios Amahan? (Colosas 3:1; 1 Pedro 3:22; Mga Buhat 7:55)

Materyal nga gigamit sa pagbuhat sa tawo

Ang unang tawo gitawag ug “Adam”. Ang “Adam” gikan sa pinulongang Hebreo nga ang katumbas sa ingles “red earth” ug sa binisaya “pulang-yuta”. Ang tawo gitawag ug Adam o

“pulang yuta” o yutang kolonon. Busa ang tawo gikan gayod sa yuta. Paminaw: “Sa singot sa imong nawong magakakaon ka sa tinapay, hangtud nga mopauli ka sa yuta; tungod kay gikan niini gikuha ikaw, kay abog ka ug sa abog ikaw mopauli (Genesis 3:19).

Ang tawo gimugna gikan sa mga pisikal nga materyales nga nagagikan sa yuta. 99% sa kinatibuk-ang bahin sa lawas sa tawo nagagikan sa unom (6) ka elemento: oxygen, carbon, hydrogen, nitrogen, calcium, and phosphorus. 0.85% lang ang potassium, sulfur, sodium, chlorine, ug magnesium. Tanang mga elementong gikinahanglan aron masustineran ang kinabuhi komon sa “pulang-yuta” o 'yutang kolonon' o clay. Sa laktod, ikaw ug ako nagagikan sa yuta—ug sa yuta kitang tanan mopauli.

Apan adunay mahinungdanong kalainan sa tawo. Sa tanang binuhat sa Dios, ang tawo lamang ang gihuypan sa Dios sa ilong niini aron makabaton ug kinabuhi. Ang ginhawang nagagikan sa Dios maoy naghatag ug kalainan sa tawo kung itandi kini sa tanang adunay ginhawang binuhat sa Dios. Tungod niini aduna siya'y dyotayng tipik sa Diosnong hiyas. Niini ang tawo nakabaton ug kapasidad nga *m a k a k a t - o n , m a k a h i b a l o ,* makapangatarungan, may lohika, aduna'y pagbati, emosyon, ug pagka-mamugnaon. Labaw sa tanan, tawo lamang ang gitagan-an ug importanteng bahin sa kinatibuk-ang laraw

sa Dios. (Ato kining hisgotan sa uban higayon sa usa ka basahong ipamantala sa CGI)

Ang pagkabuhi, ang kinaugalingong pagkaamgo ug pagka-aktibo, sa bisan unsang mga kalihokan nga atong atubangon, nagpaila lamang nga ang tawo adunay mga hiyas nga bisan tuod kini limitado nagagikan gayod sa gahom sa nagbuhat kaniya. Ang mga kasinatian nga atong naeksperensya niining tawhanong paglawig, usa ka pagtan-aw-daan kong unsa gayod ang usa ka binuhat nga pareho sa Dios. Gasa kini sa katawhan nga nagagikan mismo sa kahitas-an.

Ang pamahayag nga ang tawo gibuhath sumala sa panagway ug larawan sa Dios (Genesis 1:26) aduna pa'y lawom nga kahulogan. Dili lamang porma ang gipasabot niini kondili ang iyang potensyal, kapasidad, kapabilidad, ug ang iyang padulngan ug dangatan sa kinatumyan niining pisikal nga kinabuhi. Tungod niini ang tawo gipiyalan ug gihatagan sa Dios ug responsibilidad nga magdumala ug maghari sa mga binuhat nga ubos kaniya'g matang. (Genesis 1:28-30)

Ang komposisyon sa tawo

Unsa man gyud ang komposisyon sa usa ka tawhanong kinaiya? Sa Genesis 2:7 atong mabasa: "Ug giuamol ni Jehova nga Dios ang tawo gikan sa abog sa yuta, ug gihuypan niya sa mga buho sa iyang ilong sa gininhawa sa kinabuhi, ug ang tawo nahimong kalag nga

may kinabuhi.” Ang pulong nga “nephesh” hebreo. Ang katumbas sa binisaya “kalag”. Gigamit kini ka 755 ka basis sa karaang tugon sa Biblia. Dili lang tawo ang gipahinungdan niini kondili apil na ang mga binuhat nga adunay kinabuhi ug ginhawa. “Living creatures” kung tawgon sa ingles. Ang “nephesh” nga gihubad sa “kalag”, mao gihapo'y gigamit sa pagbuhat sa tawo diin ang abog o 'yutang kolonon' gihuypan sa ginhawa sa Dios usa' pa kini mahimong “buhing kalag” o “living being”. Wala ka'y makitang versiculo sa mga panid sa Biblia nga nagsugyot nga adunay “kalag nga walay kamatayon” o “immortal soul”.

Gipamatud-an kini sa Ezekiel 18:4 “Ania karon, ang tanang mga kalag ako man, ingon man ang kalag sa amahan, ingon man usab ang kalag sa anak nga lalake ako man: ang kalag nga makasala, kini mamatay.” V- 20 “Ang kalag nga makasala, kini mamatay: ang anak dili magapas-an sa kasal-anan sa amahan, ni ang amahan magapas-an sa kasal-anan sa anak; ang pagkamatarung sa matarung anha kaniya, ug ang pagkadautan sa dautan anha kaniya.”

Ang prinsipyong gikapasikaran niining lunsayng kamatuoran mabasa sa Roma 6:23, “Kay ang suhol gikan sa sala mao ang kamatayon, apan ang walay bayad nga gasa gikan sa Dios mao ang kinabuhing dayon diha kang Cristo Jesus nga atong Ginoo.” Ang silot

sa sala kamatayon dili walay katapusang kasakit didto sa impyerno. Ang kasulatan tinawng nagpahayag nga ang “kinabuhing-dayon” gasa gikan sa Dios. Ang kinabuhing-dayon gasa alang sa mga matinud-anon ug masaligon sa Dios. Wala kini magagikan sa atong tawhanong kinaiya. Wala kita matawo nga aduna na'y kinabuhing-dayon o “immortality”.

Hunahunaa ra gud mga higala; kon aduna na kita'y kinabuhing-dayon sa sinugdanan pa lamang, kon nakabaton na kitang daan niini gikan pa sa atong pagkahimugso', dili na nato kinahanglan nga motuo ug molaom pa kang Cristo, dili bah? Kay matud pa Niya (diha sa versiculong maoy madali-daling kutloon sa mga nagpailang hanas nga mga magtutudlo sa Biblia) : “Kay gihigugma gayud sa Dios ang kalibutan nga tungod niana gihatag niya ang iyang bugtong Anak, aron ang tanan nga mosalig kaniya dili malaglag, kondili makabaton ug kinabuhing dayon, (Juan 3:16). Anaa, mismo si Cristo nagpasalig nga kon kita mutuo ug mosalig Kaniya ang ganti “kinabuhing-dayon”. Hatagan ka pa ba kon aduna kana niini?

Busa ang kinabuhing-dayon gitagana lamang sa katawhan ubos sa kundisyon nga ikaw ug ako mutuo ug modawat kang Cristo isip atong kaugalingong Manluluwas.

Lawas ug Kalag

Usa' nato' ipadayon, basahon nato' ang Mateo 10:28. "Ug ayaw ninyo pagkahadloki sila nga magapatay sa lawas apan dili arang makapatay sa kalag; mao hinooy kahadloki ninyo ang arang makalaglag sa kalag ug lawas didto sa inferno (Mateo 10:28). Unsay buot ipasabut ni Cristo? Igahin usa' nato' ang mga eksplanasyon niini sa ulahing mga panid.

Sa dili kumplikadong pahayag mahitungod sa kinaiya sa tawo, atong pakunhuron sa sayon sabton nga mga talaid o kwentada kong unsa gayod siya. Ug dili katingad-an nga mahibulong ug mahimuot ka sa kadali diay sabton sa mga kamatuorang giilang misteryo sa kadaghanan.

Busa, unsa ang komposisyon sa tawo? Ang Biblia nagaingon nga ang tawo gilalik sama sa larawan ug panagway sa Dios. Sa gihisgotan na, ang pulong nga Adam sa hebreo gihubad sa sa ingles nga "red earth", sa binisaya "pulang-yuta" - gikan sa abog sa yuta. Sa dihang giporma si Adan, ang iyang lawas wala'y kinabuhi, wala maginhawa.

Ang iyang pisikal nga lawas gihimo gikan sa yuta. Nakatala kini sa Genesis 2:7: "Ug giumol ni Jehova nga Dios ang tawo gikan sa abog sa yuta, ug gihuypan niya sa mga buho sa iyang ilong sa gininhawa sa kinabuhi, ug ang tawo nahimong kalag nga may kinabuhi."

Ang lawas nga giporma gikan sa yuta walay kinabuhi, walay ginhawa. Nakabaton lamang

kini'g kinabuhi sa dihang gihuypan sa Dios sa “ginhawa sa kinabuhi” ang mga buho sa iyang ilong.

Tan-awa:

Adan = lawas nga giporma gikan sa yuta

Sa dihang gihuypan sa Dios pinaagi sa “ginhawa sa kinabuhi” ang mga ilong sa walay kinabuhing lawas ni Adan, niadtong tungora lamang siya nakabaton ug kinabuhi. Ang lawas nga walay kinabuhi nahimong “buhing binuhat” o “living being”.

Ang ginhawa sa pinulongang Hebreo “nshamah”, ang kahulogan niini hangin. Sa dihang ningsulod na ang “nshamah” sa walay kinabuhing lawas ni Adan, nahimo na siyang usa ka “buhing binuhat”. Nakabaton na siya'g pagkaamgo, salabotan, panimuot ug kalagsik. Ang katumbas sa Hebrohanong pulong nga nephesh “buhing binuhat”. Ang nephesh gigamit usab nga reperensiya sa mga hayop nga adunay gininhawa.

Usa pa, ang pulong nga espiritu sa Hebreo “ruach” ug “pneuma” kini sa pinulongang Griego. Usa lamang ang hubad sa duruha, “hangin” o “ginhawa” sa binisaya. Busa, ang espiritu (hangin o ginhawa) maoy naghatag sa tawo ug kinabuhi ug salabutan (life, awareness, consciousness). Matud sa Job 32:8: “Apan anaay usa ka espiritu diha sa tawo, ug ang gininhawa

sa Makagagahum nagahatag kanila ug salabutan.”

Hunahunaa:

Ginhawa (hangin, Espiritu) = Espiritu sa
Tawo

Ang Dios maoy tinubdan sa kinabuhi sa Tawo. Ang Job 33:4 nagpamatuod, “Ang Espiritu sa Dios nagbuhat kanako, Ug ang gininhawa sa Makagagahum nagahatag kanako ug kinabuhi.” Ang espiritu sa tawo nga gikan sa Dios maoy tinubdan sa tawhanong kinabuhi.

Dugang pa: Zacarias 12:1, “Ang palas-anon sa pulong ni Jehova mahitungod sa Israel: Mao kini ang giingon ni Jehova, nga nagabuklad sa mga langit, ug nagabutang sa patukoranan sa yuta, ug nagahimo sa espiritu sa tawo sulod kaniya...”

Ang espiritu sa tawo maoy tinubdan sa kinabuhing tawhanon, apil na ang kapasidad sa panghunahuna, pagkasayod sa iyang pagka-ania, ug sa tanang butang nga naghimo kaniyang tawhanon. Gumikan niini nakabaton siya'g emosyon, naghimo kaniyang mamugnaon, makatarunganon, ug kinaugalingong pagkasayod, ug uban pa.

Hunahunaa:

Buhing Kalag = Buhing Binuhat

Karon, ania ang sukaranan sa talaid sa tawo:

Adan = Lawas

Ginhawa = Espiritu sa Tawo

Buhing Kalag = Buhing Binuhat

Ang pormula o sukaranan:

Adan dugangan ug Ginhawa gikan sa Dios =
Buhing Kalag

Lawas dugangan ug Espiritu sa Tawo =
Buhing Binuhat

Sa laktod ug pinakasayon nga pagsumada, ang “kalag” mao ang kinatibuk-ang komposisyon sa lawas ug espiritu sa tawo nga naghimo kaniyang usa ka “buhing binuhat”.

Unsa man ang kamatayon?

Ang kamatayon maoy paghunong ug pagkatapos sa kinabuhing tawhanon. Sa Job 34:13-15 atong mabasa: “Kinsa ba ang naghatag kaniya ug gahum sa pagmando sa ibabaw sa yuta? Kun kinsa ba ang magbuot sa paghatag kaniya sa tibook nga kalibutan? Kong iyang ipahaluna ang iyang kasingkasing sa iyang kaugalingon, Kong iyang tigumon ngadto sa iyang kaugalingon ang iyang espiritu ug ang

iyang gininhawa. Ang tanang unod mangawala sa tingub, Ug ang tawo mahabalik pag-usab sa abug.”

Juan 6:63, “Ang nagahatag ug kinabuhi mao ang espiritu; ang unod walay kapuslanan. Ang mga pulong nga akong gisulti kaninyo-kini espiritu ug kinabuhi.” Ang Biblia naghulagway nga ang kamatayon mao na'y higayon diin ang tawo miginhawa na sa iyang “kataposang ginhawa”.

Salmo 104:29, “Ginatagoan mo ang imong nawong, sila nangalisang; kon kuhaon mo ang ilang ginhawa, mangamatay sila ug mamalik sa abug. Nagakuha ka sa ilang gininhawa, nangamatay sila; ug namalik sa ilang pagka-abug.”

Dugang pa. Ang Biblia nagaingon nga sa takna nga namatay ang lawas, ang tawo wala na'y panimuot o pagkahimatngon. Tan-awa: Ecclesiastes 9:5, “Kay ang mga buhi nasayud nga sila mangamatay: apan ang mga minatay dili mahibalo sa bisan unsa, ni may balus pa sila; tungod kay ang ilang handumanan hikalimtan.”

Kon mobulag ang espiritu (ginhawa sa kinabuhi) sa tawo gikan sa iyang patayng lawas, wala kini kaugalingong panimuot o kasayuran. Mobalik kini sa Dios nga maoy naghatag niini. Tagoan kini sa Dios ug ibalik kini sa tawo sa panahon nga siya pagabanhawon. (Ang pagkabanhaw o 'resurrection' usa ka mahinungdanong

hilisgotan nga atong hataga'g makuting pag-usisa sa basahon nga mainyong libre; mag request lang pinaagi sa address na nasulat sa cover niining basahona)

Sumala sa Biblia, ang kahimtang sa mga patay sama lang sa natulog. Daniel 12:2, "Ug ang daghan kanila nga nangatulog sa abug sa yuta mahigmata, ang uban ngadto sa walay-katapusang pagtamay."

Ang Dios naghatag ug kinabuhi, siya usab ang mobawi niini. Sa takna nga bawion na sa Dios ang ginhawa sa tao, ang espiritung maoy tinubdan sa kinabuhi mobalik sa Dios ug ang wala'y kinabuhing lawas mobalik sa yuta diin didto usab kini nagagikan. Palihog basaha: "Ug ang abug mobalik nganhi sa yuta ingon sa kaniadto, ug ang espiritu mobalik ngadto sa Dios nga maoy naghatag niini." (Ecclesiastes 12:7).

Busa, ang sumada sa kamatayon ingon niini:

Lawas kuhaan sa Espiritu sa tawo =
Kamatayon (ang espiritu mobalik sa Dios)

Espiritu Santo o Holy Spirit

Atong hisgotan ang Espiritu Santo. Ang Espiritu Santo lahi sa 'espiritu sa tawo'. Sa 1 Corinto 2:11-12, atong mabasa: "Kay kinsa bang pagkatawhana ang nasayud sa mga hunahuna sa tawo gawas sa espiritu nga anaa nianang tawhana? Maingon man usab, walay

bisan usa nga makasabut sa mga hunahuna sa Dios gawas sa Espiritu sa Dios. Apan kita nanagpakadawat dili sa espiritu nga iya sa kalibutan, kondili sa Espiritu nga gikan sa Dios, aron kita managpakasabut sa mga hiyas nga gikahatag kanato sa Dios.”

Ang Espiritu Santo sa Dios mahimong molambigit sa espiritu sa tawo pinaagi sa procesong gitawag ug “in-dwelling of the Holy Spirit”. Ang pakiglambigit (or fusion) sa Espiritu Santo sa 'espiritu sa tawo' mahitabo kini sa higayong ang tawo modawat ug mutuo kang Cristo isip iyahang Manluluwas, maghinulsol ug magpabautismo sumala sa paagi nga gilatid sa Mga Buhat 2:38. “Ug si Pedro mitubag kanila, "Paghinulsol kamo, ug pabautismo kamo ang matag-usa kaninyo sa ngalan ni Jesu-Cristo tungod sa kapasayloan sa inyong mga sala; ug madawat ninyo ang gasa nga Espiritu Santo.”

Ang pagkadawat sa Espiritu Santo mahitabo pinaagi sa pagpandong sa mga kamot ug pagampo sa nagbautismong ministro. Dinhi magsugod ang relasyon sa tawo sa Dios Amahan ug kang Jesucristo isip usa sa mga espirituwal nga anak sa Dios.

Matud pa ni Jesus sa Juan 14:16-17: Ug ako mangamuyo sa Amahan, ug kamo iyang pagahatagan ug laing Manlalaban nga magapakig-uban kaninyo hangtud sa kahangturan; nga mao ang Espiritu sa kamatuoran, kang kinsa ang kalibutan dili

makadawat tungod kay ang kalibutan dili man makakita kaniya ni makaila kaniya. Apan kamo nakaila na kaniya, kay siya nagapuyo man uban kaninyo, ug maanha siya sa sulod ninyo.

Dugang pa: Apan kamo wala diha sa unod, hinonoa anaa kamo sa Espiritu kon tinuod man nga ang Espiritu sa Dios nagapuyo diha sa sulod ninyo. Ang wala magbaton sa Espiritu ni Cristo dili iya ni Cristo. (Roma 8:9).

Ang pormula sa usa ka tawo nga nakadawat sa Espiritu Santo mao kini:

Lawas dugangan ug Espiritu sa Tawo
dugangan pa ug Espiritu Santo = Matuod nga
Kristiano

Panghimaraut sa mga tawong dautan

Karon, atong sabton kon unsa gayod ang buot ipasabot ni Jesus sa iyang gisulti sa Mateo 10:28. "Ug ayaw ninyo pagkahadloki sila nga magapatay sa lawas apan dili arang makapatay sa kalag; mao hinooy kahadloki ninyo ang arang makalaglag sa kalag ug lawas didto sa inferno."

Ang buot lang ipasabot sa 'pagkalaglag sa kalag' mao ang hipnong pagkalaglag sa lawas ug espiritu sa tawo pinaagi sa kamatayon. Mao kini ikaduhang kamatayon.

Ang talaid sa ikaduhang kamatayon:

Kalag kuhaan ug lawas kuhaan ug espiritu =
ikaduhang kamatayon

Kini ang kataposang panghimaraut—ang kumpletong pagkalaglag sa lawas (kalag) ug espiritu sa tawo didto sa linaw sa kalayo—ang final na kamatayon nga wala na'y higayon nga mabanhaw pa.

Unsa man gayod ang destinasyon sa tawo?

Sumala sa 2 Pedro 1:3-4, ang Kasulatan nagpadayag nga ang tawo makaambit sa balaan ug diosnong kinaiya sa Dios. Tan-awa: “Ang iyang diosnong gahum naghatag kanato sa tanang butang bahin sa kinabuhi ug pagkadiosnon, pinaagi sa atong kahibalo kaniya nga nagtawag kanato sa iyang kaugalingong himaya ug pagkahalangdon, nga tungod niana kita iyang gikahatagan sa bililhon ug dagku uyamot nga mga saad, aron nga pinaagi niini kamo managpakaikyas gikan sa pagpangadunot nga ania sa kalibutan tungod sa pangibog, ug mangahimo kamong mag-aambit sa diosnong kinaiya.”

2 Timoteo 2:10, “Busa ginaantus ko ang tanang butang tungod sa mga pinili, aron sila usab makabaton sa kaluwasan nga diha kang Cristo Jesus inubanan sa himayang dayon.”

Ang kinatumyang tumong ug destinasyon sa

tawo mao ang paghimo nila nga mga anak sa Dios. Mao kini ang ebanghelyo mahitungod sa Gingharian sa Dios nga gisangyaw ni Cristo sa dinhi pa Siya sa kalibotan. Ang Gingharian sa Dios usa ka gingharian nga ang kinatibuk-ang ginsakopan puro mga anak sa Dios, kinatibuk-ang pamilya sa Dios.

Ang Hebrohanon 2:10-13 nagaingon:

“Kay angayan gayud kaniya (Cristo), alang kang kinsa ug pinaagi kang kinsa naanaa ang tanang butang, nga sa pagdala niya sa daghang mga anak ngadto sa himaya, iyang pagahingpiton ang mag-uugda sa ilang kaluwasan pinaagi sa pag-antus. Kay siya nga nagabalaan ug sila nga ginabalaan, tanan sila usa rag gigikanan. Mao man gani nga wala niya ikaulaw ang pagtawag kanilag mga igsoon; sa iyang pag-ingon, Ipahayag ko ang imong ngalan ngadto sa akong mga igsoon, sa taliwala sa kapunongan, magaawit ako sa among pagdayeg. Ug usab igabutang ko ang along pagsalig Kaniya. Ug usab, Ania Karon, ako ug mga anak nga gihatag sa Dios.”

Kining paghimaya mahitabo sa pagkabanhaw. Ang kausaban mahitabo sa pagkabanhaw sa mga matarung.

Palihog basaha:**1 Corinto 15:42-49**

Maingon man usab niana ang pagkabanhaw sa mga patay. Ang lawas nga igatisok madunot ra, apan ang lawas nga unya pagabanhawon dili madunot.

Kini igatisok sa kaulawan, apan kini pagabanhawon unya diha sa kadungganan. Kini igatisok nga mahuyang, apan kini pagabanhawon unya nga makagagahum.

Kini igatisok ingon nga lawas nga lawasnon, apan kini pagabanhawon ingon nga lawas nga espirituhanon. Kon aduna may lawas nga lawasnon, aduna man usab ing lawas nga espirituhanon.

Sa ingon niini ang kasulatan nagaingon, "Ang unang tawo nga si Adan nahimong binuhat nga buhi"; apan ang katapusang Adan nahimong espiritu nga maghahatag ug kinabuhi.

Apan ang nahauna dili mao ang espirituhanon kondili ang lawasnon, ug unya ang espirituhanon.

Ang nahaunang tawo gikan sa yuta, hinimog abog; ang ikaduhang tawo gikan sa langit.

Ang mga hinimog abog samag kinaiya niadtong unang gihimo gikan sa abog; ug ang mga langitnon samag kinaiya niadtong gikan sa langit.

Maingon nga kita nagasul-ob sa dagway sa tawo nga hinimog abog, kita usab managsul-

ob unya sa dagway niya nga gikan sa langit.

Roma 8:14-19

Kay ang tanang ginamandoan sa Espiritu sa Dios, mga anak sila sa Dios.

Kay wala kamo makadawat sa espiritu sa pagkaulipon aron mangahadlok na usab kamo, hinonoa maoy nadawat ninyo ang espiritu sa pagkainanak. Sa dihang managtuwaw kita sa pagpangamuyo nga magaingon, "Abba! Amahan!"

ang Espiritu gayud mao ang magapanghimatuod uban sa atong espiritu nga kita mga anak sa Dios,

ug nga kon kita mga anak, nan, mga manununod diay kita, mga manununod sa Dios ug mga isigkamanununod uban kang Cristo, kon moantus man kita uban kaniya aron pagahimayaon usab kita uban kaniya.

Giisip ko nga ang mga pag-antus niining panahona karon dili takus ikagtandi sa himaya nga igapadayag ra unya kanato.

Kay ang tibuok kabuhatan nagapaabut nga mahinamon sa pagkapinadayag sa mga anak sa Dios;

Ania Karon ang sumada o talaid sa mga anak sa Dios:

Espiritu sa Tawo dugangan ug Espiritu Santo
dugangan pa ug Espirituhanong Lawas =
Mahimayaong Anak sa Dios

Suma-Total

Unsa'y kinaiya sa tawo? Ang pinaka-komposisyon sa tawo, sumala sa pahayag sa Genesis 2:7 klaro nga: lawas (body) dugangan ug espiritu sa tawo (spirit in man) = buhing kalag. Ang mga pahayag o mga pagpasabot nga sukwahi niini dili hingsaypang mga bana-bana, panaghap, tumo-tumo lamang ug klarong nagagikan sa kinaugalingong interpretasyon ug spekulasyon—dakong sukwahi sa balaang pulong sa Dios.

Labaw sa tanan, ang makapaukyab ug kulbahinam nga bahin niining mga gibatbat na nga mga kamatuoran mao ang pakiglambigit sa tawhanong espiritu (spirit in man) sa Espiritu Santo (Holy Spirit) diin sa kinatumyan maoy maghatag ug espirituhanong lawas ug diosnong kinaiya sa tawo. Mao kini ang angayan paga-laoman sa tanang mosulod sa usa ka pakigsaad (covenant) sa Dios pinaagi kang Cristo. Hinumdumi: Espiritu sa tawo dugangan ug Espiritu Santo sa Dios, dugangan ug Espirituhanong lawas, mag-resulta sa usa ka Espirituhanon nga mga Anak sa Dios.

Final nga sumada:

**Lawas dugangan ug Espiritu sa Tawo =
Buhing Kalag**

**Lawas kuhaan ug Espiritu sa Tawo =
Kamatayon
(ang espiritu sa tawo mobalik sa Dios)**

**Lawas dugangan ug Espiritu sa Tawo
dugangan pa ug Espiritu Santo = Tinuod nga
Cristiano**

**Lawas kuhaan ug Espiritu sa Tawo =
Ikaduhang Kamatayon**

**Espiritu sa Tawo dugangan ug Espiritu
Santo dugangan pa ug Espirituhanong
Lawas = Mahimayaon mga Anak sa Dios
(Glorified Sons of God)**

Ania ang mga ulahing pagdasig ug pagpasalig gikan kang Apostol Pablo sa Filipos 3:20-21, "Apan kita mga molupyo sa langit, ug gikan niini atong ginapaabut ang Manluluwas, ang Ginoong Jesu-Cristo. Siya mao ang magausab sa atong timawa nga lawas aron kini mahisama sa iyang mahimayaong lawas..."

Kana mga higala ang simpleng kamatuoran nga wala isangyaw ug gihikaw nga ipasabot sa kadaghanan. Dalaygon ug mahimayaon gayod ang mga laraw sa Dios alang sa tawo!

The Church of God International
Meeting Places

Manila

6th Floor, Peaksun Bldg.
Princeton St.
Mandaluyong City
Saturdays, 2 p.m.

Naga

New Crown Hotel
Elias Angeles cor.
P. Burgos St.
2nd-5th Saturdays
10 a.m.

Alabang

Crimson Hotel
Entrata Urban Complex
Filinvest City
2609 Civic Drive
Muntinlupa City
Saturdays, 2 p.m.

Cebu

Rajah Park Hotel
Fuente Osmeña Circle
Cebu City
1st Saturday of the Month
10 a.m. - 2 p.m.
0920-2626413

Malolos

Hiyas ng Bulacan
Convention Center
Malolos City
Saturdays, 2 p.m.

Mindanao

Alzon's Palace, Maranding
Lala, Lanao del Norte
Saturdays 10 a.m.
Rogen Francisco
0935-2039729

Iloilo City

Iloilo Midtown Hotel
Yulo St.
Saturdays, 2 p.m.

Brgy. Kiara, Don Carlos
Bukidnon
Saturdays 10 a.m.
Dirick Huradas
0935-6734803

Masbate City

Brgy. Vito, Sagay
Negros Occidental
Saturdays, 2 p.m.

For Further Information

If you would like to visit a CGI congregation, or if you would like to speak with a CGI minister or representative with any questions you may have, feel free to write or call us. We will be delighted to serve you in any way possible.

United States:
Church of God International
P.O. Box 2525
Tyler, TX 75710
(903) 825-2525

Canada:
Church of God International, Canadian Office
121-525 Highland Rd. W.
Kitchener, ON N2M 5P4

Australia:
Church of God International
P.O. Box 171
Boonah, Qind 4310

Philippines:
Church of God International
Makati Central P.O. Box 2450
1264 Makati City, Philippines
Tel: (632) 995-0294
Tel/Fax: (632) 995-0577
Cel: 0917-8116365



This booklet is a free educational service
in the public interest, published by

Ang Iglesia sa Dios Internasyonal adunay mga ministro ug representante nga andam makig-istorya ug mag-alagad kaninyo. Kon aduna kamo'y kinahanglan nga masayran mahitungod sa mga butang espirituwal, magpahibalo lang aron magahinan kamo ug panahon aron pagsilbihan.

MGA BASAHON NGA LIBRENG MAINYO:

- Ang Imong Kapalaran
- Gihinloan na ba ang mga Pagkaong Gidili sa Karaang Tugon?
- Kanus-a Nabanhaw si Jesus?
- Katapusan na ba ang Kamatayon?
- Unsa Man ang Tawo?

I-TEXT lang ang ngalan ug kumpletong address sa
0920-2626413 • 0917-8116365

God's Annual Holy Days

	Passover	Feast of Unleavened Bread	Pentecost	Feast of Trumpets
2019	April 19	April 20-26	June 9	Sept. 30
2020	April 8	April 9-15	May 31	Sept. 19
2021	March 27	March 28- April 3	May 16	Sept. 7
2022	April 15	April 16-22	June 5	Sept. 26
2023	April 5	April 6-12	May 28	Sept. 16
2024	April 22	April 23-29	June 16	Oct. 3
2025	April 12	April 13-19	June 1	Sept. 23
2026	April 1	April 2-8	May 24	Sept. 12
	Day of Atonement	Feast of Tabernacles	Last Great Day	
2019	Oct. 9	Oct. 14-20	Oct. 21	
2020	Sept. 28	Oct. 3-9	Oct. 10	
2021	Sept. 16	Sept. 21-27	Sept. 28	
2022	Oct. 5	Oct. 10-16	Oct. 17	
2023	Sept. 25	Sept. 30 - Oct. 6	Oct. 7	
2024	Oct. 12	Oct. 17-30	Oct. 24	
2025	Oct. 2	Oct. 7-13	Oct. 14	
2026	Sept. 21	Sept. 26 - Oct. 2	Oct. 3	

You can download free literatures in PDF format. You can also download our new phone, tablet, and television app, CGI Digital Network. This app is packed with powerful content and resources to help you grow in grace and knowledge. Just visit our website cgiphils.org.

You can also check our Youtube channel, The Church of God International, Philippines. It includes sermons, sermonettes or Bible studies presented by ministers and leadership graduates from CGI Philippines.



8F Unit H, IBM Plaza, Eastwood City, E. Rodriguez Jr. Ave.,
Bagumbayan, Quezon City, MM Philippines 1110

Makati Central P. O. Box 2450, Makati City, MM, Philippines 1264
TelFax: 995-0577, Tel: 995-0294, Cell: 09178116365

Internet Address: www.cgiphils.org
Email Address: cgiphils@yahoo.com